

464 Das dreyzehende Buch Petride Crescentijs/

wenn solches alles wol vntereinander gesotten/ sollestu zwey pfund gemeiner Seiffen daru nter gehen vnd schmelzen lassen/ vñ mit solcher Brüe/ die Käudige Hunde vier oder fünff Tag nach einander wol wäschen/ salben vnd baden lassen/ So wirstu gewislich dieses Recept/ so offtermaln probiert/ köstlich gut vnd bewehrt befinden.

Das fünff vnd zwenzigste Capitel.

Wenn die Hunde lausig weren/ vnd Flöhe/oder aber Würme hetten/ wie sie zu reinigen.



Wenn die Hunde Lausig/ voller Flöhe/ vnd ander Ungezifers weren/ bevorab/ wenn grosse hitz ist/ so solt du sie im Wasser schwemmen/ oder zehen guter Handvoll wilden Kressen/ wilden Maieron/ Salbey/ Rosmarin/ Rauten/ vnd sechs Handvoll gestossen Saltz nemen/ vnd solches alles mit einander kochen/ vnd wol einsieden lassen/ darnach mit ein gutem theil solcher Brüe die Hunde sauber wäschen. Für die Würme das dieselbige vergehen/ vnd außfallen/ solt du gestossen Harn/ gestossen Aloen/ gestossen vngelöschten Kalck/ vnd lebendigen Schwefel nemen/ vnd diese Stücke alle mit einander in Rindsgallen beizen/ darnach mit solcher Brüe das ort/ an welchem die Würme gewachsen seyn vnd stecken/ schmieren.

Das sechs vnd zwenzigste Capitel.

Wenn ein Hundt von einem Wilden Schwein gehawen/ oder von einem Hirsch/ oder auch sonst verlegt/ vnd seine Fuß verschret hette/ wie er zu curiren vnd zu heilen sey.



Ie Hunde werden zum offtermaln von den wilden Schweinen an vielen orten gehawen vnd verwundet/ vnd ist sonderlich der Schade vnten her am Leibe vnd Bauch am gefährlichsten/ darumb solle man dieselbigen nach gestalt vnd gelegenheit der Wunden vnd Schadens/ widerumb zu recht bringen vnd heilen/ So denn der Schade am Bauch also offen were/ das die Därme/ doch noch ganz vnd vnverletzt/ heraus hiengen/ soltestu die Därme erstlich fein sitiglich vnd linde in ihr vorige alte statt einlegen/ darzu ein stück Speck in das Loch stecken/ vnd darnach den Schaden mit einer Balbierers Nadel zusammen hefften/ so offt du aber ein Haffe thust/ sollestu denselbigen mit einem Knöpflein zusammen binden/ vnd jedes mal den Faden abschneiden/ sollest aber mercken/ das du in alle offene Schäden ein stück Speck stoffest/ darumb sollen die Jägerknecht allwegen Speck/ Balbierer Nadel vnd Faden/ wenn sie auff der Jagt seyn/ bey sich tragen.

Wenn auch ein Hundt von einem Hirsch verlegt/ so solle man Balswurk/ ein Pflaster von Steinklee/ Bechrosen Del/ eines so viel als des andern nemen/ Pflaster darauf machen/ vnd dieselbigen ober den Schaden schlagen/ damit aber das Pflaster desto ehe vnd basz haften möge/ solt du das Haar da die Wunde oder Schaden ist/ zuvor hinweg scheren/ Ist auch ein Hundt sonst verwundet/ so nimb den Safft von dem roten Köl/ vnd schlag denselbigen ober den Schaden/ so wirstu sehen/ das die Wunden darvon geschwindt zusammen heilen wirt.

Item/ wenn die Hunde in den Hecken vnd Stauden/ auch in den Felsichten harten Bergen/ ihre Fuß auffgeloffen/ vnd zerrissen hetten/ Soltu erstlich ihre Fuß mit scharpfem Saltzwasser wol wäschen/ vnd darnach ober den Schaden ein Pflaster von Enerklar/ vnd gutem Weinessig/ Meusohr Safft wol durch einander geklopfft schlagen/ so werden sie darvon geheilet.

Das